

DECLARACIÓN INSTITUCIONAL

O pasado día 13 de setembro reuniuse na cidade de Zaragoza, o Consello Territorial da FEMP, que representa a todas as federacións territoriais de municipios, provincias, consellos e cabidos insulares, nel aprobouse, por **UNANIMIDADE**, unha resolución de todos os participantes relacionada coa adopción de medidas sobre a negociación da reforma do modelo de financiamento local.

A FEGAMP, nunha recente reunión da súa executiva, e por unanimidade, acordou, así mesmo, que na negociación do novo modelo de financiamento local deberían ser introducidos os criterios de número de entidades singulares de poboación, extensión do territorio e avellentamento da poboación na distribución da participación en ingresos do Estado, por influír nos custos de prestación dos servizos municipais.

Polo que, coa finalidade de asumir e subscribir todas as propostas aprobadas polo Consello Territorial da FEMP e pola Comisión Executiva da FEGAMP, os tres Grupos Políticos con representación na Deputación Provincial da Coruña, fan a seguinte **DECLARACIÓN INSTITUCIONAL**.

1º Expresar a firme vontade de apoiar a FEMP durante o proceso de negociación que está a realizar en representación e defensa dos intereses de todas as entidades locais.

2º Considerar necesaria a unidade das entidades locais en torno ás propostas presentadas pola FEMP, que require unha resposta desde a lealdade institucional por parte dos responsables do Ministerio de Economía e Facenda, Ministerio de Administracións Públicas e Gobiernos das CC.AA, que aínda sendo coherente en relación á situación económica xeral, garanta a actividade, a prestación de servizos e o exercicio das responsabilidades públicas que se realizan de modo efectivo dende todas as entidades locais.

3º Considerar necesario incrementar a proposta de previsións para o exercicio orzamentario do ano 2009, presentado polo Ministerio de Economía e Facenda, en aplicación do sistema actual de financiamento, en relación á participación dos tributos do Estado polas entidades locais, e que se inclúa unha previsión de aumento do financiamento local con cargo aos orzamentos do ano 2009.

4º Solicitar do goberno do Estado o compromiso firme de mellorar o financiamento local, ao igual que se incluíu na proposta do Ministerio de Economía para as Comunidades Autónomas.

5º Reiterar a necesidade de que este proceso de negociación sexa impulsado, nas próximas semanas, conforme ao calendario e contidos aprobados na Mesa Negociadora

Bilateral FEMP-Gobierno, pechando simultaneamente o acordo de financiamento local xunto co das CC.AA.

6º Unha vez pechado o acordo de negociación deste proceso, debe formularse a súa continuidade nos ámbitos territoriais entre os gobernos das CC.AA. e os partidos políticos e cada unha das federacións Territoriais, para determinar a participación das entidades locais nos ingresos das Comunidades Autónomas para avanzar no proceso da segunda descentralización desenvolvendo o pacto local.

7º Instar, coincidindo coa resolución aprobada polo Consello Territorial da FEMP en Zaragoza, ao goberno da nación e a todos os partidos políticos representados no Parlamento do Estado para acadar de forma inmediata, desde o imprescindible consenso, un acordo de Estado para a aprobación dun novo estatuto do goberno local, onde se recoñeza o marco de competencias reais e se respecten os principios básicos e irrenunciáveis de igualdade, equidade, suficiencia financeira e autonomía local en todo o territorio, de concellos, deputacións, consellos e cabidos insulares.

8º Instar a que na reforma do modelo de financiamento local, para a distribución da participación nos ingresos do Estado, se teñan en conta os criterios de número de entidades de poboación, extensión territorial e avellentamento, de acordo coa resolución da FEGAMP.